



AGAPE

Vol. XXXII No. 308

FEBRUARY 2018



Naupang tete Isua hnenah

Phek - 2

**Thlarau Thianghlim leh
Chanchin Ṭha hril**

Phek - 8

SERMON

KRISTIAN CHHUNGKUA

ARTICLE

EI SIAM DAN

HRISELNA

Lak man	:	Kum khatah	₹ 80.00
		Copy khat	₹ 5.95

EDITORIAL BOARD

<i>Editor</i>	:	<i>Lalrinpuii</i>
<i>Joint Editors</i>	:	<i>Lalbiakhluni</i> <i>Lalmuanzuali</i>
<i>Circulation Manager</i>	:	<i>K. Lalthanpuii</i>
<i>Member-te</i>	:	<i>1. Denghmingliani</i> <i>2. B. Bualchhumi</i> <i>3. Rothangliani</i> <i>4. Lalsangluaii</i> <i>5. Lalpianthangi Hrahsei</i> <i>6. Rev. Dr. C. Chawngmingliana</i>
<i>Publisher</i>	:	<i>Rev. P.C. Pachhunga</i>
<i>Agape Phone No.</i>	:	<i>0389-2326372</i>
<i>email :</i>		<i>0389-2301824</i> <small>(Heng number-ah hian office hun chungin biak theih a ni.)</small>
<i>agapechanchinbu@gmail.com</i>		<i>0389-2322285</i>

A chungu thu awnte

- | | | |
|---|---|----|
| 1. Editorial | - | 1 |
| 2. Kristian chungkua : Naupang tete Isua hnenah | - | 2 |
| 3. Sermon : Thlarau Thianghlim leh Chanchin Ṭha hril | - | 6 |
| 4. Synod Inkhawmpuih ka palai ve a | - | 10 |
| 5. Buhfaitham rawngbawlna hi | - | 12 |
| 6. Buhfaitham hla | - | 17 |
| 7. Ka hausakna Isua | - | 18 |
| 8. Kristian chungkua kan ni chiah em? | - | 23 |
| 9. Hriselna Huang : Kawṭhalo laka naupang ven leh enkawl | - | 26 |
| 10. Ei siam dan : Bawngsa pickle | - | 30 |
| 11. Hruaitute chanchin | - | 31 |
| 12. Arunachal West zin report | - | 32 |

Editorial

Pathian awmpuina leh hruainain kum 2018, February thla kan lo chuang kai leh ta reng mai. Mi mal, chhungkua, kohhran leh khawtlangah hma chi hrang hrang lain kan buai theuh niin a lang. Mahni hma zawn theuhvah leh mahni hna theuhva thawh rim leh taimak hi mihringte tih tur reng a ni a. A bik takin ringtute hi Pathian thuin taima tur leh awm mai mai lo turin min chah a ni.

Thil pakhat erawh kan hriat reng a tul. Chu chu a huna ngawih theih hi a ni. Kan thahnemngaih luattukna lamah tawngkam mawi lo hman mai te a awl thin a. Kan rawngbawlpuite, kan thawhpuite leh kan chenpuite lakah duhthawh luat vanga an rilru hliam thei tawngkam hman a awl hle. Kan lei veng tha turin Bible hian min chah mawlh mawlh a ni. Tin, kan tawngka chhuak pawh mite hliam zawng ni lovin, "*chia al, khawngaihna tel*" ni turin min chah baw.

Kum 2018 kan hman tan mekah hian Lal Isua, a hniaka kan zui theih nana entawn tur min hnutchhiahtu pawh kha roreltute hmaah a ngawih reng thu Bible chang tam takah kan hmu a ni. Thiam lohna reng reng nei lo khan keimahni avangin a thiam thu a sawi lo a nih kha. Kan thiam thu han sawite hi a chakawm kan ti thin. Mahse, kan thiam thu sawi aiin kan chetzia leh miziate hian mi dangte rilru a hneh zawk thin a ni.

Thufingte buah chuan, mi a pawh hi a ngawih reng chuan mi finga ngaih a ni thin tih kan hmu a. Sap thufing pawhin ngawih theih hi rangkachak tluk hiala hlu niin a sawi baw. A tul huna ngawi thei mite hi mi chak, hnehtu leh mi dangte hruai theitu an ni thin tih hi zir thar leh ila. Mihringte hian harsatna te tawkin, lungngaihna te kan tuar thin. Mahnia pai reng lova tute emaw hna sawi chhuaha rilru tihzangkhai kan chak thin. Hetiang hunah hian dawhthei taka ngaithlatu kan mamawh thin a ni. Chuvangin, mi dangte nena khawsak ho thiamin, tawng tam ber leh boruak luah vek thintu ni lova, ngaithlatu tha nih i tum theuh ang u.

*Kristian Chhungkua***NAUPANG TETE ISUA HNENAH**

– *Upa K. Lalhnema
Ramhlun Venglai*

Tunlai khawvel kan hun hman mêkah hian kan thu hriat leh sawi tam ber pakhat chu, Mizo kan lo soal tak zia, kan Kristianna lo dal tâk zia tih hi a ni ta tlat mai. Chanchinbuah soal chi hrang hrangah Kristian rama thleng âwm lo tak hmuh tur a tam ta hle mai. Chanchinbuahte alo lan tam tâk êm avang hian kan Mizo nun leh Kristiante nun hian tun hma kha chu kan phâk ta lo tih hi a pawm theih awme. Chuvângin, Mizo Kristian ten a tiha kan tihsual langsâr, rûkrûk, tualthah, pâwngsual, corruption, hmeichhiat mipatna hman dik loh leh ngâwvei chi hrang hrang, HIV/AIDS vei lo tam tam ta êm êm leh Biak In rawk tih thleng maia lo awm ta hi eng vang nge, eng nge a chhan i lo ngaihtuah teh ang u. A chhan a awm ngei ang.

Kohhran Hmeichhiate chuan, kum tam tak kal ta atang khan, 'KRISTIAN CHHUNGKUA' hi an lo vei tawh a. An thupui ber pawh chhûng inkhawm nitina neih ziah leh buhfaiþham a ni a. An veina leh an beihna pawh a hlawhtling hle kan ti thei ang. Chhûng inkhawm nitina nei ziah, buhfaiþham þham ziah percentage pawh a sâng ta hle a ni. Kohhran Hmeichhiate lo beihna chu a sâwt love tihna lam ni lovin, Presbyterian Kohhran Synod Inkhawmpui chuan tûn aia nasa a kan beih leh, hma zau zawka kan lâk hi a

hun ta niin a hria a. Kum 2006, June thlaa Synod Executive Committee chuan -

1. Bial leh kohhran tinah Kristian chhûngkaw campaign neih theuh ni se.
2. Kristian chhungkua tih hi Synod Revival Speaker-ten thupui atân neih theuh ni se.
3. A thei apiang kohhranin Kristian Chhungkaw Committee siam ni se, tiin a rêl tawh a nih kha.

Kristian ramah heti tak maia سوالنا lo pung ta hi kohhran leh chhungkaw tinte hi a tisualtu leh mawhphûrtu pakhat chu kan ni

ngei mai. Tun hma hun kal tawhte kha han thlir let ila, Pathian thuin kan tih tur leh tih loh tur, awm dan mawi leh tha a sawi te kan tu leh fate hnenah kan hrilh lo va. Heng Thusawm pek - tualthat suh, rûk i ru tur a ni lo, i uire tur a ni lo tihte leh Lal Isua Chhandamna thu te leh Pathian thu dang tam tak hre lova naupang seilian an lo tam ta. Kristian inti Kristianna tak pawh phâk lo, Kristian lemchang, nu leh pate Kristian an lo nih avanga Kristian ni ve mai, zû leh ruih theih thil tih thulh chuang lo, mihringpuite pawh hlau lo, Pathian pawh hlau lo kan tam ta. Heng ang mite thupui leh duhsam chu soal rawngbawl a ni mai.

Kan rama sualna chi hrang hrang lo tam ta êm êm hi a lo bo va, Kristian nun dik tak kan neih leh theih nâna pawimawh tak nia lang chu, tuna nausen thanglian mek, naupang kum 5 aţanga kum sawm leh pangate Pathian thua kaihruai leh zirtir, Lal Isua hnên hruai thlen ngei hi thupui berah neih ni se.

Kohhran leh chhung tinte hian tihtakzeta ţan lâk hi kan tih

tur a ni. Khawvelah hian chatuan rama kan chhawm theih tûra Pathian min pêk awm chhun chu kan fanau ro chante hi an ni a. An thlarau dinhmun tur pawh ngaihtuah lo hian khawvel finna leh thiamna, tangka sum ngaihtuah luat nên, ei puar lutuk nen, zu ruih nen, dam chhûng ropuina leh hlimna ngaihtuah hian kan rilru a khat lutuk anga, kan rohlu ber - kan tu leh fate hi kan chan mai palh ang e. Hmanlaiin Lal Davida chuan Philistia lal Akisa hmêlmate a dopui hlânin Davida khua, Ziklag chu Amalek-hovin an lo bei a, an nupui leh naupangho salah an lo hruai bo vek mai a. Chutiang deuh chuan Chatuan rama kan chhawm theih loh, khawvel thila kan buai lutuk lai hian kan fanau rochante hi hmelmapa Setana hian min lo rûk bo sak ve mai ang tih a hlauhawm khawp mai.

*KAN FANAU RO CHANTE
HI ISUA CHANCHIN I
HRILH ANG U*

Ka theihngihl theih loh, Kristianna lama tun dinhmun min thlentirtu chu, 'KA NU A NI'. Kum nga vel ka nih lai hian ka nuin kan missionary hmasate'n,

'Pathian Lehkhabu Chanchin' Mizo ṭawngin an siam a, Abraham, Nova, Josefa-te chanchin a chhiar ṭhin te chu thawnthu sawi anga sawiin min hrilh ṭhin a, ngaihnaawm hi ka ti êm êm ṭhin a, ka rilru a hneh a, ka theihngihlh thei lo. Tin, Sunday Sikulah kan zirtirtuten tihtakzetin min zirtir ṭhin bawk a. Ni tin sikulah tûk tinin Pathian biakna (Morning Devotion) kan nei ziah bawk a.

Chûng Pathian thu ka hriatte chuan ka nun nasa takin min hruai a; Sunday Sikul Department zawng zawng pal tlangin ka lo puitling ve a, tlangval lai aṭangin thusawi rawngbawlina kan Upate'n min chantir ve a, ka lawm hle.

Kum 1963 khân Shillong aṭanga lo chhuak college zir lai pahnihin 'Chhandam nih inhriat thu', 'pianthar' tih thu hmangin campaign an nei a. Thu danglam deuh tak sawi tûrah ka ngai a, ka va inkhawm ve a. An thusawi ka han hriat chuan "A va ṭha em! A dikan an va han sawi fiah em!" ka ti a, Amen tihna tûr hlir a ni a. Mi ṭhenkhatten an pianthar thu, pianthar ni leh thlate

chiang takin an sawi thei a. Kei chu eng hunlai khân nge ka pianthar a, a ni leh thla chiang taka sawi tur ka hre lo. An thusawi ka hriat chuan ka lo piangthar tawh daih a ni tih erawh ka hria. Heng hi ka sawina chhan chu Camping-ah chauh lo pawh (Camping hi a ṭha lo ve tihna ni lovin) naupangin Pathian thu an nu leh pa aṭanga an hriatte, Sunday Sikula an zir aṭangte leh sermon an ngaihthlak aṭangte in naupang tê an nih lai aṭangin an piangthar thei tih hi thu dik a ni. *"Naupang tê te ka hnênah han kaltir ula, hnâr suh u, Pathian ram chu hetiang mite ta a ni si,"* Lal Isuan a ti.

Tunah naupang kum nga aṭanga kum sawmpali hnuai lam tû leh fâ nei mêkte kan nih chuan ṭhahnemngai takin Lal Isua chanchin i hrilh ṭhin ang u. Thufing pakhat chuan, "THIR CHU A LIN LAIIN DENG RAWH," a ti a. An tâna ṭawngṭaisak leh an rilru phâk tâwk anga Pathian thu hrilh leh Lal Isua kawhhmuh leh zirtir hi kan tih ngei ngei tur a ni. All India Sunday School Association

thupui pakhat chu, "Vawiina naupangte hi kan enkawl that chuan nâktuk maiah 'Hruaitu tha' an ni ang a, kan enkawl that loh chuan naktûkah chhiatna thlentu an ni ang," tih a ni. Mizo Kristiante hi Pathian thusawi peih tak, nuam ti tak kan ni a. Pulpit rawngbâwlna pheih chu kan ngaisang a, châk pawh kan châk a ni, a lawmawm khawp mai. Amaherawchu, chu chu kan dinhmun leh awm dan a nih mêk lai hian mahni in chhungah - kan nupui fanau te, naupangte hnênah tihtakzeta tawngtai leh Pathian thu hrilh harsa ti kan tam hle mai hi a pawh khawp mai. Naupang rilru thianghlim, sual la dai tam lo, an hriat ang ang nghet taka pawm mai thin an ni a. Chuvangin, tun hi an tân hun tha a ni tih hre rengin thahnemngai takin Isua chanchin i hrilh ang u. Lal Isua hnenah i hruai thleng

ngei ang u.

Amah kan Lal Isua ngeiin, *"Naupang tête ka hnênah han kaltir ula, hnar suh u, Pathian ram chu hetiang mite ta a ni si a,"* a ti.

Thupek ropui ber zinga pakhat chu, *"Ka thupek che u hi in thinlungah a châm reng ang a, in ina in thut lai te, kawnga in kal lai te, in mut lai te, in thawh huntein in sawi thin tur a ni,"* tih a ni a. Chuvangin, chhungkaw tina mawhphurtu nu leh pate hian kan fanau ro chante hi tha-hnemngai taka awm dan tha Pathian thutak zirtir leh kaihhruai hi kan tih ngei ngei tur a ni tih hi i hre thar leh teh ang u.

Lalpan a thu malsawm rawh se. Amen.

✳ I fate Lalpa lam kawng i zirtir loh chuan ramhuaiin sual lam kawng a zirtir tho tho vang.

*C.H. Spurgeon
Hringnun Dictionary*

Sermon

**THLARAU THIANGHLIM LEH CHANCHIN THA HRIL
(Luka 4:1-22)**

– *Rev. K. Lalrinmawia*
Secretary, Synod Mission Board

Tun hnaiah video clip nuizatzhlak tak tak, mi hmui phun mila thu dang daih sawitir hi whatsapp lamah fiamthu nan an hman nasa hle a. Chung zingah chuan PM Narendra Modi-a, "*Kelkangah harhna a thleng a, kan hre vek a ni lo'm ni? Ka inbin ve ngei kha,*" an tihtir khan nuhi a tiza takzet.

Nia, hmun hrang hrang atanga mi tam tak Kelkanga kan zin ruih ruih kha rei a la ni lo. Kha hlimpui boruak kha thenkhat chuan kan la chhunzawm hial ta ve ang! Pathian Thlarau Thianghlim khawih harhna chan kan duh a, neih sum sengin, hrehawm pawisa lovin khaw chhe hnuaiyah pawh kan inphur lut zut zut reng a. Mi lian leh mi te thliarna awm hauh lovin Kelkang khawtlangin inhawng takin min lo dawng mup mup ni tin a. Thlarau Thianghlina harhna chan kan duh theuh va, chang pawhin kan inhre thin. Chutih laiin mi engemaw zat thlarau chan rah chhuak erawh chu belh chian a dawl loving tih kan hlau bawh thin. Chuvangin Thalarau

Thianghlimin Pathian mite a hruai thin dan kawng tawi tein kan chhui lawk dawn a ni.

Lal Isua a hruai dan : Luka 4:1,2-ah Lal Isua Thlarau Thianghlimin a khat a, thlalerah Thlarau Thianghlimin a hruai tih kan hmu. Khatih laia Thlarau Thianghlina khat Lal Isua kha a hlim bung bungin a lang lo, chutih ahnekin mahni chauhvinn thlalerah a awm a. Ni sawmli chhung lai chaw ngheiin a awm tawh a. Chutia ril tam taka a awmlai ngei chuan Diabola'n kawng thum, hautak ngial ngialin a thlem tih kan hmu a nih kha. Khang thlemna te kha tawi tein i han chhui lawk teh ang.

1. Lung chhanga chantir tura thlemna : Juda-te chaw

rinpui chu barli atanga chhangphut siam, tui leh hriaka hmeh kawia ur hmin a ni. Chu chu an tana 'buhchangrum' chu a ni a; keini Mizote chuan chhang kan ti ang. Ni sawmli lai eng mah reng ei lova a awm lai ngei khan a thiltitheihna (ama thuneihna) hmanga 'ei tur insiam' turin a thlem a ni. Chu chu Thlarau Thianghlim hruaina, Thlarau Thianghlima khata a awm laia thil thlang zu ni tlat a!

He thlemna hi economics thlemna tih awm tak a ni. Ei leh bar thil a ni tlat! Mahse, Thlarau Thianghlim hruaina dawng tak taktu Isua Krista chuan economics thlemna chu a hneh a, a tihbuai phak lohva a ding nghet tlat a ni.

Keini Mizo Kristian, Thlarau Thianghlim tihharhna chang fo te ngei hian economics thlemna kan tawk ve thin. Sawrkar hna thawk te, politician te, sumdawng te, contractor leh mi chi tin hian Thlarau Thianghlima harhna kan chang thin. Mahse, kan ram hi corruption-free state a va la ni si lo ve! Thlarau Thianghlim hruaina kan chang takmeuh em? Mahni

theuh inen fiah a tula, mahni ngei kan infiah a ngai. Inkhawmna leh zai khawmna hmunahthe Thlarau Thianghlim hruaina chang ber angin lang thin mah ila, kan in leh lo din dan, kan ei bar zawmna kawnga kan hlawhtlinna leh kan fate kan kaihhraina kawngah chu chu a lang chhuak ve tur a ni dawn lo'm ni?

2. *Politics thlemna* : Thlarau Thianghlim hruaia awm Lal Isua chu Diabola chuan tlang sang takah a hruai a, khawvel ram zawng zawng a entir a, chumi chungathuneihna leh a ropuina chu pek a tiam a; mahse, Diabolah a pek theihna turin Isuan tih tur pakhat chiah a nei ve - 'bawkkhupa Diabola chibai buk.'

Thil kalphung pangngaia a kal chuan kumin kum tawp lamah ram hruaitu kan han thlang leh ang a. Chutih hunah chuan candidate-te zingah Thlarau Thianghlim hruaia awm ngam kan hmu ang em? Thlangtu mipui zingah vote hralh duh khawpa Diabola chibai buk kan awm ang em? Candidate emaw, an campaigner/party worker-te emaw pawh ni se Diabola chibai buk mai duh an rawn inseh mur



leh tuau tuau ang tih a va hlauhawm em! Kelkanga soal sim entir nan chirhdiak leh diak lo pawh sawi lova inbin kual zak zak te kha inthlan dawnah pawh Thlarau Thianghlim hruaina chauh zui ngam theuh tur a ni.

3. *Thlarau mina hmanga thlemna* : Diabola chuan Jerusalem Pathian biak in (Temple a ni ngei ang)-ah a hruai leh a. Chu biak in chhipzumah chuan a dah a. Pathian Fapa a ni ngei tih miten an hriat theih nan chuta tanga tla tur chuan a thlem leh a. Bible thu behchhanin, "Han tla thla la, vantirhkohten an lo dawmche ang a, ina miah lovang," atia. Thlarau Thianghlim hruaia awm Lal Isua chuan '**thlarau mi**' nihna kawnga thlemna chu a hneh leh a ni.

Kum 1906 khan Mizo Kristianten harhna kan chang tawh a. Kum 1913-a harhna thlipui thawh hnihna atang phei chuan mite aia thlarau chang sang zawk nia lan duhna a lian ta hle. Tlira pawl an lo chhuak a, Kohhran an chhuahsan ta hial. Chumi hnuah pawh harhna chang nia inhria, Thlarau chang sang riau nia inngai hi harhna

thlaphenah an lo inzep ve fo ta mai. A tirah chuan Thlarau Thianghlim tiharhna tak tak an chang ngei pawh a nih a rinhlelhawm lo. Mahse, Thlarau Thianghlim awmpuina changte ngei hi Diabola'n a luhchilh ve thuai thin tih hi hriat reng tur a ni.

Chutianga harhna changte chuan 'Pathian aw' hriain an inngai fo. Kelkang behbawmah leh Kelkang harhna tel lo pawhin "mi dang aia thlarau chang sang leh chang thuk zawk nia inngaihna" hi Diabola'n Mizo Kristiante min hneh fona a ni. Harhna chang inti zingah Kohhran chhuahsan duhna hial lo thleng thin hi Lal Isua thlalara Thlarau Thianghlim hruaia a awm laia Diabola thlemna ang kha a ni thei. Mi dang aia hre ril leh 'rau zawk ngial anga lan duhna thlarau chapo chu Pathian atanga chhuak a ni tawh lo tih hriat reng a ngai a. Pastor leh Upa te, Kohhran Hmeichhe hruaitute leh KTP hruaitute aia thlarau mi zawk anga lan duhna hi Diabola hnuai kunte zia a ni tih hriat a va pawimawh em!

4. **Mi zawng zawng fakin a awm** : Khatia, thlalara Diabola a hneh hnu khan Thlarau thiltitheihna puin Galili ramah a

haw leh a; ṭawnghriatloh leh nunphung danglam khawpin a sa bual bual kher lo. Mahse, mi zawng zawng fakim a awm. Mi thenkhat, "thlarau mi" inti bing deuh ho chauh faka awm a ni lo va, mi zawng zawng fakim a awm tih hi chhinchhiah tel a pawimawh bawh.

5. Thlarau Thianglim thumna chu Chanchin Ṭa hril nan a lo ni : Harhna chang Lal Isua chu thla khat aia rei daih fianriala hun a hman zawh chuan Nazareth-ah a lo haw leh a. Sunagog-ah a inkhawm pangngai ve leh mai a. A hun neih tum chuan zawlnei Isaia 61:1,2 a chhiar a, Judate tih dan pangngaiin ṭhu chungin a sermon ta a. Chuta a thusawi chu "Pathian Thlarau Thianglim ka chung a lo thlen chhan chu Chanchin Ṭa hril turin a ni," tiin a khai khawm theih. Chanchin

Ṭa hril chuan sal chhuah zalente, mitdel mit tihvar leh tihduhdah tuar (oppress)-te chhanchhuah te hi a keng vek a. Chu hna chu Synod pawhin a thawk reng a, a enkawltu pawl Hospital Board te, Social Front leh Mission Board te a siam hial a ni. Heng zawng zawng hi Chanchin Ṭa hrilna (thu chauh ni lo, thiltih ngeiin) kawng vek a ni. Mahse, keini Thlarau chan hian chu lam kawng chu min zawhtir em? Ramthar rawng-bawlna ngaihthah ṭhaka thlarau mi kan nih chuan kan chan thlarau chu Pathian aṭanga chhuak a ni chiah a ngem tih mahni i inzawt ṭhin ang u.

Economics thlemna, politics thlemna leh Thlarau mina hmanga thlemna te hi do zo turin Pathian Thlarau Thianglim chuan min tichak ṭheuh rawh se. Amen.

SAWMNA

February ni 15–18, 2018 chhung hian Darlawn Pastor Bial Kohhran Hmeichhia chuan Bial Inkhawmpui rualin Darlawn Bial Kohhran Hmeichhe Golden Jubilee a lawm dawn a. He hun min hmanpui tur hian Darlawn Pastor Biala Kohhran Hmeichhe Member lo awm tawh zawng zawngte kan sawm a che u.

Sd/- Secretary, Darlawn Bial Kohhran Hmeichhia

SYNOD INKHAWMPUIAH KA PALAI VE A

– Sailuti Asst.
Secretary, PWF &
Ex-Officio, Central Committee

Mizoram Synod Inkhawmpui vawi 94-na chu December ni 6–10, 2017 chhung khan Bungkawng Kohhran Biak In, Aizawlah hman a ni a, Aizawl Chhim Presbytery atangin Kohhran Hmeichhe aiawhin Pi Chalziki, Kulikawng nen kan palai ve a, Kan Presbytery-in Kohhran Hmeichhe aiawha Synod palai atana hmeichhiate a ruat vawi khatna a ni a, kan palai ve hi kan lawm takzet a ni.

Kumina Synod Moderator chu Rev. F. Lalrinnunga a ni a, Secretary-te chu Rev. Lianhmingthanga Sailo (Sr.) leh Upa R. Dengzikpuia (Jr.) te an ni. Thlarau lam thupui - "Kohhran - Pathian Chhungkua" (Ephesi 2:19) sawitu chu Rev. Lalbiaknia, Chaltlang a ni. Kumin Synod-ah hian Pastor 25 nemngheh an ni a, Pro. Pastor 16 lak an ni. Palai kal zat 2129-ah hian hmeichhia, palai ni sa leh Presbytery atanga palaite, kan vaiin mi 23 kan ni. Kum 2018 Synod Inkhawmpuina tur chu Electric Veng Kohhran Biak In, Aizawlah nia, Electric Veng Bialin an thleng dawn a ni. Thlarau lam

thupui: "I ram lo thleng rawh se" (Mt. 6:10) sawitu tur chu Rev. Dr. Vanlalngbaka Ralte, ATC a ni.

"Engtin nge Synod-ah in rawn palai ve theih dan?" tih zawhna kan dawng nual a. Keini pahnih kumina Synod Inkhawmpuia Aizawl Chhim Presbytery atanga kan palai ve theih dan chu hetiang hi a ni:

Mission Veng Bial Kohhran Hmeichhe Inkhawmpui, 2017-a rel angin, PCI Dan Bu {Seventh Revised Edition (Reprint-2016)} Bung V para 2 sub-para (o)-in, 'Presbytery tinin kum tin Synod Inkhawmpuia palai turte Kohhran Hmeichhia leh Thalaite telin a ruat ðin ang'

tih PCI Dan hi tih puitlin a nih ngei theih nan, Bial Kohhran Hmeichhia leh KTP aiawhte Synod Inkhawmpui palaia telh ve dan tur min ngaihtuhsak turin Mission Veng Pastor Bial Standing Committee -ah ngenna theh luh a ni a. Bial Standing Committee chuan he thu hi Bial Kohhran Inkhawmpui, 2017-a ngaihtuah atan a chhawp chhuak a. Kan Bial - Mission Veng Bial Inkhawmpui, 2017 rel angin, "PCI Dan Bung V(2)(o) ang hian Kohhran Hmeichhia leh KTP aiawh Synod palaia telh ve dan ngaihtuah ni rawh se,' tih chu Aizawl Chhim Presbytery Inkhawmpui (2017)-a ngaihtuah atan thlen a ni ta a.

October ni 5-8, 2017 -a Aizawl Chhim Presbytery Inkhawmpui vawi 39-na, Saikhamakawn Kohhran Biak Ina neih chuan he thu hi ngun taka ngaihtuaha sawi hovin, "Kohhran Hmeichhia leh KTP-te Synod Palaiah ruat thin ni se, palai ruat dan tur chu Standing Committee-in lo

bawhzui rawh se," tiin Thurel No. 2-naah a lo rel ta a ni. Heta rel ang hian Aizawl Chhim Presbytery Standing Committee chuan kumina Synod Palaiah Kohhran Hmeichhia leh KTP-te min rawn ruat ve ta a ni (Kum 2017-a Synod Inkhawmpuia Kohhran Hmeichhie aiawha palai tur hian Mission Veng Bial Kohhran Hmeichhe Chairman leh Kulikawn Bial Kohhran Hmeichhe Chairman te ruat an ni).

Kan Presbytery atanga Kohhran Hmeichhia leh KTP te Synod palaiah ruat thin tura kan Presbytery Inkhawmpui in a rel hi a lawmawm kan ti tak meuh a ni. Synod Inkhawmpui meuha palai kan han ni ve hi a ropui kan ti a, thurel ngaihnawm leh bengvarthlak tak tak, pawimawh em em te, zaipawl zai mawi tak takte leh thuhril ropui tak tak kan ngaihtlakte khan kan rawngbawlna kawng hrang hranga hmasawna atan nasa takin min tanpui ngei kan ringin kan beisei a ni.



BUHFAITHAM RAWNGBAWLNA HI

– *Pastor Sairengpuia Sailo*

Buhfaitham rawngbawlna hi Pathianin nasa takin a hmang a, rawngbawlna tlawm tak leh hnuaihning tak angin lang mah se, ropui takin a par chhuak mek a. Chhungkaw tinten tlem tlema kan thawkhawm kha rawngbawlna awmze nei leh tangkai takah a lo chang a. Kan kohhran sum hmuhna hnar nghet leh nghing lo, kan kohhran tinghettu hmanraw pawimawhah a lo tang ta a nih hi. Kan kohhran buhfaitham rawngbawlna hi khawvelah Pathianin a tarlang tan mek a, he rawngbawlna chanchin hi hnam changkang zawkte pawhin ropui an ti a, hahipin an sawi ta mek a ni. Buhfaitham rawngbawlna hlutna, a pawimawhna leh nasa taka malsawma a awm chhan hi kawng hrang hrangin a sawi theih awm e.

1. **Buhfaitham rawngbawl-na hi Mizo hnam ze mil a ni** : Khawvel hnam hrang hrang hian zia kan nei a, kan zia hi a inang lo khawp mai a, chin phung, ei duh zawng, ngaihsan zawng, ropui kan tih leh kan ngaihhlut zawngte hi a inang lo em em a ni. Asia rama hnam hrang hrang te hi a huhova thil ti chi, kut ruala chet la chi kan ni hlawm tlangpui a. Khawthlang mite (westerners) erawh chu mahni inngaihtuah a, mahni inching fel leh mal kal deuh an ni hlawm tlangpui. Buhfaitham hi a huhova chet lakna, tih khawm ngei ngei

ngai, mahni chauhva kalpui chuan awmze nei phak lo a ni. Buhfaitham hi kan "thil ti khawm thin zia" nen hian a inmil em avangin rawngbawlna thang duang tak a lo ni ta tiin a sawi theih awm e.

2. **Buhfaitham rawngbawl-na hi chung tin ngam taka an tel ve theihna a ni**: Chhungkaw tin huap, chungh tinte inthlahrung lova an tel theihna, rethei ber chhungkua pawh an tel ve vek ngamna chu Buhfaitham rawngbawlna hi a ni. Buhfaitham rawngbawlna tel ve tur hian buhfai tham a ngai a,

chhungkaw tinin buhfai kan nei vek a, kan neih zat a inanglo a ni mai. Zak leh inthlahrung lova chhungkaw tin tel theihna a nih avangin rawngbawlna malsawm dawng tak a lo ni ta ani.

3. **Buhfaitham rawngbawlna hi Pathian tana eng emaw tal tih ve duhna thinlung atanga lo irh chhuak a ni :** Buhfaitham ngaihtuah chhuak-tute khan Pathian tan sum leh pai hnemhnang tham thawhkhawm tur an neilo tih an hria a, mahse Lalpa tan eng emaw tal chu tih ve tul an ti a, an neih zawng buhfai tham khawm an rawt ta mai ani. Pathian hnen atanga malsawmna dawn tum vanga inpek a awm thei a, malsawmna dawn duh vanga thilpek hlan pawh a awm thei ang. Chungte ai chuan Pathian tana eng emaw tal tih ve duh hrim hrimna thinlung hi a hlu em em a, Pathianin a pawm a, mal a sawm tih hi Buhfaitham rawngbawlna atang hian kan hmu thei ani.

4. **Buhfaitham rawngbawlna hi Kohhran rawngbawlna hnuk pawimawh a ni :** Buhfaitham rawngbawlna hi a tir ata Kohhran Hmeichhiain a kalpui ni

mah sela, Synod pum pui rawngbawlna nghawng khawpin a thawh hlawk a, Synod hian rawngbawlna pawimawhah a ngai a, buhtham rawngbawlna hian Synod lairil tak a chang phak a ni. Buhtham rawngbawlna hi lo tawp ta thut sela Synod rawngbawlna kal mek hi nasa takin a thuanawp phak hial ang, chu chuan Buhfaitham rawngbawlna hi Synod lairil khawih phak rawngbawlna a ni tih a tar lang chiang hle.

5. **Buhfaitham hi rawngbawlna tlawm tak a ni:** Buhfaitham rawngbawlna hi hmeichhe tlawm zawkten bul an tan a, harsatna leh hmuhsitna a lo paltlang nasa tawh em em a. Tunlai thleng hian mi thenkhat chuan rawngbawlna tlawm sawi chhuahna tehkhin thu atan an hmang a, "Hmeichhia hi chuan thil dang ngaihtuah lovin buhfaitham hi buaipui sela a tawk," han ti duh te pawh an awm! Hei hian buhfaitham rawngbawlna hi rawngbawlna tlawm tak a ni tih a lantir chiang hle. A buaipuitu te, a la khawmtute, a thawh khawmtute, a leitute thleng hian thlir ila, neck-

tie awrh leh suit ha an vang pharh mai a, rawngbawlna tlawm tak a nihzia kan hmu thiam maiin a rinawm.

6. Buhfaitham rawngbawlna chanchin hian khawvel a dengchhuak : Buhfaitham rawngbawlna tlawm tak hian khawvel a deng chhuak tlat mai! Buhfaitham rawngbawlna lo inñan dan te, sum hnar pawimawh a lo nih tak dan te, chhungkaw tin deng chhuak a nih dan te, kum khata a lo tlin khawm tam takzia te hi khawvel tan chanchin ngaihnaawm a lo ni ta a. Central Kohhran Hmeichhiaten Buhfaitham documentary film an siam te kha You Tube-ah hian hmuh tur a awm a, ÷awng hrang hrangin an letling tawh a, miin an ngaihlu em em zel a ni. Khawvel Mission chanchin zir mi te ngaihven a hlauh a, khawvel huap rawngbawltu tam tak chuan rawngbawltura mi dangte cho chhuah nan buhfaiham rawngbawlna hi an tlangaupui mek ani.

7. Buhfaitham rawngbawlna hian kohhrana mi harsate a thleng phak :

Buhfaitham rawngbawlna hian kohhran chhunga rethei leh harsate ngaihtuahna lamah kohhran rilru a hruai tlat ÷hin. Buhfaitham hralh chhuahna tur ngaihtuah laiin a sum hmuh tam theihna lam ngawt ngaihtuah lovin kohhran chhunga rethei leh harsate dinhmun ngaihtuahnain rilru a hruai lian zawk ÷hin. Buhfaitham rawngbawlna kaltlang hian kohhran chhunga mi harsaten ngaihsak leh ngaih pawimawh an hlauh tih an inhria a, kohhran an rawn hnaih an intineitu sawt thei. Buhfaitham VIP chu mi retheite an ni.

Heng buhfaiham rawngbawlna pawimawhna, hlutna leh malsawma a awm dan kawng hrang hrang kan han tar lan tak ang khian buhfaiham hi Lalpan mal a sawm nasa hle a ni tih hi a taka hmu ve ngei tu ka ni:

- November ni 14, 2014-ah khan Phnom Penh Christian Forum buatsaihin mahni inchawm kohhran phun chungchang seminar-ah sawm ka ni ve hlauh mai a. Cambodia rama Western missionaries, Eastern Missionaries, Christian NGO

hruaitu leh tualchhung kohhran hruaitu mi 120 zet kal khawmna a ni a. Chumi tuma Speaker Jean Johnson, World Mission Associates lama Executive Programme Director chuan paper tha tak a present a. A paper-ah chuan Mizo kohhran mahni kea an din dan chanchin a tar lang a, a khat tawkin Mizo kohhran anga "mahni kea ding thei kohhran" phun tura chona a tar lang tluan parh a. Central Kohhran Hmeichhiate Buhfaitham documentary kha Cambodian tawnga lehlin (dub) an chhuah bawk a. Kei Mizo lo awm ve khiau mai chu min dintir a, kut an beng dur dur a. Mizo nih a nawm tum tak a ni. Khawvel huapa mission lama hnuhma nei tham khawpa rawngbawl mek te leh hnam changkang kan tih te pawhin buhfaitham rawngbawl na chanchin an han hriat chuan ropui an ti em em a ni.

- Cambodia ramah hian Buhfaitham rawngbawl na chanchin hi phak ang tawkin Mizo missionary-te hian kan sawi ve thin a. Mi thenkhat chuan Internet lam atanga buhfaitham rawngbawl na

chungchang lo hmelhriat pawh an awm. Pastor thenkhat chuan an kohhranah pawh an kalpui tan ve mek a, an buhfaitham lak khawm an hman tangkai dan erawh a inang lo hlawm hle. Thenkhat chuan tualchhung sum atan an hmang a, thenkhat chuan kohhran chhunga hmeithai leh retheite an sem thin. Buh ring ve bawk an nih avangin buhfaitham rawngbawl na hi an tan hriat thiam a awl a, an tan han kalpui ve mai pawh a remchang hle nghe nghe a ni.

June, 2017-ah khan Cambodian Pastor pasarih chu Mizoram Presbyterian Kohhran zir turin Aizawl ah an lo zin a. Kohhran hrang hrang tlawhin kohhran inkhawm hrang hrang an chhim a, kohhran rawngbawl na hmun pawimawh an fang deuh vek bawk a. Pathianin Mizote min hruaina leh kohhran min dinsak ropuizia an sawi nasa a. An thil hmuh zingah Thawhtanni tuk khat Mission Veng Kohhran hmeichhiaten buhfaitham an hralh lai an thlir (observe) khan an rilru a hneh em em a, an sawi ning thei lo. An haw hnuah mahni kohhrana

Buhfaitham kalpui ve nghal pawh anawm. Aizawla lo zin ve zinga pakhat Pastor Lav Hoewn chuan hmanni lawk khan, "Kohhran pathum kan nei a, heng kan kohhranah hian tunah chuan buhfaitham kan kalpui kim thei ta!" tiin a lawm thu a sawi.

Buhfaitham rawngbawlna hi Pathian tana eng emaw tih ve duhna thinlung atanga lo rah

chhuak a nih ang tak hian Pathian tana eng emaw tal tih duhna thinlung nen buhfaitham rawngbawlna hi kan la kalpui zel em?

Pathianin buhfaitham rawngbawlna hi heti tak hian mal a sawm a, malsawm zel pawh a la tum niin a lang. Hetih lai hian keiniho hian ngaiah neihih kan lo inthlahdahan mai em?

(Pastor Sairenguia Sailo hi Mizoram Synod tirhin Cambodia-ah Missionary Pastor-in June, 2012–January, 2018 chung a awm a. He thuziak pawh hi Cambodia-a a awm laia a ziah a ni. - Ed.)

-
- Kan dam chung nite a ral dawn hnaih hun chuan kan zawhna dawn tur chu - eng zat nge i neih tih ni lovin eng zat nge i pek tih a ni ang a. Eng zat nge i dawn tih aiah eng zat nge i thawh tih a ni ang. Eng zat nge i khawl theih tih aiin eng zat nge i hlan tih a ni ang a, chawimawina i dawn aiin rawngbawlna atana i inpekna chu a pawimawh zawk daih ang.

- Nathan C. Schaeffer

- Kristian taka hna hawh hi a \ha a, Krista tana hna thawh chu a \ha zawk; mahse hna thawktu chu Krista'n a chenchilh a, amah hmanga Krista'n ama duh dan ang ngei a thawh chu a \ha ber a ni.

- Hringnun Dictionary
(C.H.Thangkuma)

BUHFAITHAM HLA

Doh is E.

Phuahtu - Lianchhingpuii
Hamornised by Lahnungrengi Kiangte

$$\left(\begin{array}{c|c|c|c|c|c|c|c|c|c} m : m : m & f : - : m & m : - : - & r : - : - & r : r : d & m : - : r & r : - : - & d : - : - \\ d : d : d & d : - : d & d : - : - & t : - : - & t : t : s & d : - : t & t : - : - & s : - : - \\ s : s : s & l : - : s & s : - : - & s : - : - & f : f : m & s : - : s & s : - : - & m : - : - \end{array} \right)$$

$$\left(\begin{array}{c|c|c|c|c|c|c|c|c|c} d : d : d & s : - : l & s : - : f & m : - : - & r : - : - & r : r : d & m : - : f & m : - : - & r : - : d & d : - : - \\ s : s : s & m : - : f & m : - : d & d : - : r : d & t : - : - & t : t : d & d : - : d & d : - : - & t : - : s & s : - : - \\ m : m : m & m : - : s & s : - : s & s : - : l : s & s : - : - & s : s : m & s : - : l & s : - : - & s : - : f & m : - : - \end{array} \right)$$

Thunawn

$$\left(\begin{array}{c|c|c|c|c|c} s : - : - & m : - : - & r : r : d & m : - : f & m : - : - \\ m : - : - & d : - : - & t : t : s & d : - : d & d : - : - \\ d : - : - & s : - : - & s : s : m & s : - : l & s : - : - \end{array} \right)$$

$$\left(\begin{array}{c|c|c|c|c|c|c|c} r : r : d & m : - : f & m : - : r & d : - : - & r : - : d & m : - : - & - : - : - \\ t : t : s & d : - : d & d : - : s & s : - : - & t : - : s & d : - : - & - : - : - \\ s : s : m & s : - : l & s : - : f & m : - : - & s : - : m & s : - : - & - : - : - \end{array} \right)$$

$$\left(\begin{array}{c|c|c|c|c|c|c} r : - : - & r : - : - & r : r : d & m : - : f & m : - : r & d : - : - \\ d : - : - & t : - : - & t : t : s & d : - : d & d : - : t & s : - : - \\ d : - : - & s : - : - & s : s : m & s : - : s & s : - : f & m : - : - \end{array} \right)$$

$$\left(\begin{array}{c|c|c|c} r : r : r & m : - : - & r : - : d & d : - : - \\ t : t : s & d : - : - & t : - : s & s : - : - \\ s : s : m & s : - : - & s : - : f & m : - : - \end{array} \right)$$

1. Lalpa rawngbawlna hlu hi,
Chhung tin tih theih buhfaitham,
Tha leh zung seng lovin a tih theih;
Buhfaitham rawngbawlna a hlu e.

Lalpa, buhfaitham rawngbawlna
I mite min pek avangin kan lawm e;
Ropuina zawng zawng i ta lo ni se,
Malsawmin vur zel ang che.

- 2.. Buhfaitham tangkaizia hi
Ringtuten i dawn Chiang ang;
Hei ang rawngbawlna hlu hi awm maw,
Lalpa chanpual kan run chhung lumtu?
3. Lalpa ringtu zawng zawngte,
Thahnem r'u buhfaithamah;
He rawngbawlna hlu tak avang hian,
Thlarau bote chhandam an ni si.

KA HAUSAKNA ISUA (Phil. 4:11-13)

– Rev. C. Lalthanzara
Kolkata

Kan tunlai khawvelah hian hausakna kan zawwna hi LALPA-ah ni lovin, sum leh paiah a ni nasa lehzual ta khawp mai. Tute-emaw tih dan takin sum-to-sum khawvelah kan cheng mek a ni. Zir chianna pakhat sawi danin "Kan harh/men hun chhung chanve hi mihringin sum ngaihtuah nan kan hmang," tih a ni. Heti zawng hian kan kalna telh telhin a hriat a, sum kan hmuhna tur anih chuan tam tak chuan tih hreh kan nei ta meuh lo niin a lang. Zahawmna kan tehna pawh hi sum leh paiah hian a innghat thui ta hle mai. Chutiang khawvela cheng mek ringtute hi kan hausakna hi engah nge, tu-ah nge a lo inngah ve thin tih hi ngaihtuah thar fo a ngai.

Rev. H.P. Runremthanga hla, '**Ka hausakna Lalpa**' tih phuah chhuah a lo nihna boruak hi a ngaihnawmin ka hria. Aizawlah lehkha zirin a awm thin a, Hrangbana College-ah a kal thin. Zemabawkah mi in chhe ve tawh tak leh lian lem lo tak thla khata Rs. 50/- man a luah ve a. Vawih khat chu College-a amah lo hmu mawi ve deuhtuin a in luahah a va tlawh a, a hmelhriat nih pawh a duh zui ta lo a ni awm e. A khawsak a harsa ve hle a, mahni inchawm a ngai bawk si a, Zemabawk atanga College thleng bus fare a neih loh chang a tam thin. Zemabawk piaha

quarry-ah te rawra chhuin a inhlawh ve thin a, a changin thirchhia a zawng a, Durtlang Hospital kham hnuaiyah te khian thirchhe zawngin a vak kual ve zak zak thin a ni awm e.

Vawih khat chu a damsam lo deuh nen zanah inah a awm a, a in luah atang chuan Aizawl khawpui chu an thlir pheih a. In tha pui puiah electric eng lo pe chhuak un maite leh motor tlan vut vut te chu an thlir a, ti hian a ngaihtuah ta a. Mi fate chu in lian leh ropui, nuam tak takah an khawsa a, thenkhat pheih chuan an luah sen loh in an nei thliah thluah a, motor car mawi leh

man to tak tak an nei a, in chhung bungrua changkang tak tak an hung del dul mai baw si a.

Lalpa, kei ve hi zawng sawtiang in zozaiyah sawn in tih tur pakhat mah ka nei ve si lo, sawtiang motor zozaiyah sawn 'ka motor' tih tur ka nei ve baw si lo. Inhlawh chawpin in chhe te, mahni ta pawh ni lo lehngalah ka khawsa a ni a, tiin a vui rilru ta hle mai a. Chutih lai tak chuan a thinlungah LALPA chhanna a lo thleng a. Aizawl khawpui aia mawi leh nuam zawk, a khawsa thei ber khawsak ai pawha a nawm zawkna hmun tur vanram chu a tan buatsaih a ni a. Chu hmun chu Lal Isuan a nun hlanin a lo chantir ta. Khawvel mite neih loh lungawina leh thlamuanna pek a ni baw. Chumi an ngaihtuah chhuak a, Lalpa chhanna an hmu ta chu, a inrin hmain chu lai hmunah ngei mai chuan "Halleluia! Ka hausakna chu Lalpa a ni," tiin a au chhuak ta a ni.

Kan hausakna Lalpa thlir lova, a malsawmna leh kan chung a zahngaihate chhiar

lova, khawvel taka kan thlira, ngaihtuahna kan hmana, chumi chu kan nunin a zui chuan kan hausakna Lalpa hi kan hmu thiam lo thin. Mahse, miin khawvel leh a ropuina thlir lova, a hausakna thuruk Lalpa a thlir erawh chuan neih nei vak lova khawvelin a hriat, mi ropui ni lem lote pawh, taksa bawrh-sawmna a tlakbuakte pawh ni se, chhungkaw harsatnain a tuam velte pawh ni se, an manganna leh harsatna aiin Lalpa an thlir a, an hausakna thuruk Lalpa avang chuan 'Halleluia! Ka hausakna chu Lalpa a ni' tiin eng dinhmun atang pawhin lawmna, thlamuanna, lungawina leh himna nen Lalpa an lo fak thei thin. Lungawina leh hausakna tur dang an dap ruai ngai tawh lo.

Kan khualzinna ram khawvel hi kan han thlir a, sualna a pung a, thil ni thei lova kan ngaih kha kan tawng ta fo mai. Natna mak tak tak hriat chhuah thar a ni a. Langsar taka soal ngam an pung tulh tulh emaw tih tur a ni a, a lang lo lamah lah tih hreh nei lo an tam ta sawt viauvin a hriat baw. Diknate hi hmuh tur a tlem sawt ta hle mai. Mi

rethei leh hmehhriat nei tha lo tan chuan thiltih te hi a va har sawt ta em! Thil tam tak ngaihtuahin ringtu nun hi a rum thin a ni.

Chhungkuaah bawrh-sawmna te a lo thleng a, sum leh pai duh ang hmuh theih bawk si loh nen, retheih tawh nak alaiin sualnain min kiansan a tum chuang bik si lo. Kan fate zirna leh hna lamah lah duh ang diak diakin thil a awlsam bawk si lo. He hla phuahtu ang mai hian, "Lei anchhe dawng ka khualzinna he lei hrehawmah hian, harsatna leh hrehawmnain min bawm; inngahna tur reng ka nei lo, Tlantu ropui, Lalpa hnenah chauh lo chuan," kan ti ve thin a nih hi.

Kan khawvel hun tawng mek leh kan chungkuaa thil thleng thinte, kan nuna harsatna leh lungngaihna kan tawrh zawng zawngte, ringtute nun kan thlir a, kan beidawanna hmunah ngei hian Tlantu ropui, kan tana nun petu Lal Isuaah kan chawlh a ngai. Amahah damna famkim a awm a ni.

Endawng, hmuhsit leh sawichhiatte pawh kan tawk

mai thei. Lal Isua hnung kan zuia, a thu kan awih avangin chan deuh pawhin inhre mah ila, mite aia tha thawh hnem deuchte pawhin kan inhria a ni mai thei, "A atthlak deuh mang e, mi dang tih peih loh hi ka ti fo mai bik a," tih ngaihtuahnte pawh kan nei mai thei. Mahse, heng zawng zawng hi kan hmaah Lalpan a lo phur zo tawh. Anchhe dawng kan Lalpa ngei chuan ropuina leh chawimawina chu min hlan ta. Kan aia anchhe dawng lo niin, mi fel famkimkhan nang leh keiin nunna kan neih theihna turin a nun a lo hlan ta. Kan aia anchhe dawng lo ni ta Lalpa chu i tan leh ka tan damna, ropuina leh chawimawina min petu a lo ni si. A va ropui em! Lalpa chu fakin awm rawh se.

Kan Lalpa tana kan retheih ngamna, Amah avanga kan mualpho ngamnaah Lalpa a lo mawi ang a, keini pawh min chawimawi letin, khawvel hriat phak loh, khawvel pek theih loh thlamuanna, lawmna leh lungawina min pe ang. "Krista retheihpuitute chu mi hausu ber an ni, khawvel hrehawmna hian phuar vel mah se; hausakna

neitu Lalpa chu an nunna atan a lo inpe ta si."

Hei hi a ni harsatna, tihduhdahna leh retheihna hmuna ringtute tichak thintu chu. Lalpa avangin tihnavmnaah leh vuakte an tuar a, kawl bun leh tan ina khungte an tawk bawka. Lunga denin an awma, thingzainaa zai bunin an awma, thlemna an tawka, khandaiha sah hlumin an awma. Beram vun leh kel vun sinin an vakvai a, rethei takin, hrehawm takin, tihduhdahin an awma, thlalerah te, tlangah te, pukah te, khuarkhurumah te an vak an vak thin a. Sakawlh seh hlumtir an ni a, hal hlum an ni a, tel sovah te an thlak a, an hlep ral thak a, an vun an lihsak a, a letling zawnga khen beh an ni a.

Mahse, an khualzinna khawvel lama let leh ai chuan an chatuan hmun tur an thlir a, thawhleha tha lehzual an chan theihna turin an tuarna atangte chuan chhanchhuah an duh lo va. An thih aia thia, an ropuina tura tuartu Lalpa tana an martar theih ve avangin lawm thu an sawi zawk thin. Thil tha lo, kan taksa leh thlarau tan pawha tha lo, "Ka sim thei lo a ni," kan han

ti te hi chu Lalpa tuarna hian min la hneh taw lo em maw ni chu aw tih mai a awl thin.

"Krista aia thlan tur dang reng leiah hian ka hmu lo. Amah chu ka inhumhimna kulhbing sang ber a ni. Hmuhsit leh elrelna karah min awmpuiin min tanpui ang. Ka lal Kraws thiltitheihna chhuangin muangten ka leng tawh ang." "Khawvel hausakna, ropuina leh chawimawina neilo mah ila, hausa ka lo ni Krista zarah, chatuan hmun in nuam leh ropui chu ka tana buatsaih a lo ni. Halleluia! Ka hausakna chu LALPA-ah a ni."

Khawvel hausakna leh ropuina kan zawnga, a nei tam apiangin an duh tam zel mai si a, a nei tam tam an uikawm em maw tih mai tur a nia, sum hlutna an hre telh telh mai a nih hi. Nawmsak loh te kan hlau va, kan nupui/pasal fanauten rual an awk kan hlau va, a dik a dawpawh kan thlu thei lo va; mahse, chungte chuan lungawina leh hlimna min pe chuang si lo. Kan thih dawn darkarah phei chuan an hlu dawn lo teh a nia. Fate nungchang kan hloh phah hlauh phei chuan a va pawl dawn em!

Chutiang khawvela kan khawsak mek lai hian kan hausakna thuruk hi Lalpa lo ni zel sela, kan neih hlu ber pawh Lal Isua lo ni zawk rawh se. Peteran biak in kawngkhar 'Mawi' an tih bula kebai kutdawh hnenah khan, *"Tangka leh rangkachak eng mah ka nei lo; nimahsela, ka neih chhun ka pe ang che: Nazareth Isua Krista hmingin kein kal tawh rawh,"* (Tirh. 3:6) a ti mai. A neih chhun kha a dampui ta nghe nghe a nih kha.

Sodom khaw lalin Abrahama rallak sum pek a tum pawh khan Abrahama chuan, *"La zai khat te pawh, pheikhawk chilhna pakhat te pawh, i neih reng reng chu ka la lo vang. Lei leh van neitu, LALPA, Pathian Chungnungbera lamah chuan ka kut ka phar tawh a ni. Chuti lo chuan, 'Abrama chu keima tihhausak alawm,' i ti dah ang e,"* (Gen. 14:22-23) a ti mai. Abrahama hausakna kha Lalpah a ni.

Kan neih chhun, kan ro hlu ber, kan chakna hi Lal Isua lo ni ve zel rawh se. Lal Isua hi damna kim, lungawina, hlimna, thlamuanna leh thiltitheihna a ni. Hei hi Tirhkoh Paulaten, *"Engkimah lungawi zel ka ching tawh si a", "Min tichaktuah chuan engkim ka ti thei a ni"* an lo tih theihna kha a ni.

Chu chu a thlawna pek kan ni. "Ka neih thil ro sumin lei dawn ila ka Lalpa chu, ka nei law'ng chatuan chatuan thleng pawhin. Mahse, Pathian hmangaihna a thlawnin min lo pe ta ka nunna atan." "Mite mit hmuhah ka tling si lo Lalpa, Mahse, i kraws danah chuan thiam chang ka lo ni e...I hmangaihna thukzia ka han dawn chang hian, mi felte thlang lova kei mi sual min thlang hi, a makin a ropui e, aw hmangaihna hi. Ka rul seng law'ng chatuan thleng pawhin." Hei hi kan nun kaihruaituah i hmang zel ang u.

Lalpan malsawm rawh se.
Amen.

KRISTIAN CHHUNGKUA KAN NI CHIAH EM?

*Than̄thuami
Hmun̄tha*

Puithiam Elia fate'n inthawina sa dik lo taka an lak ðin leh, inbiakna puan in bula rawngbawltu hmeichhiate an mutpui ðin avangin Israel-hoten Pathian hnena inthawina leh thilhlán an hlan ðin chu miten an ngaihnephah a. Chu thu chu Puithiam Elia chuan a hriatin a fate chu a zilhau ta a. Mahse, an pa thu chu an awih duh chuang lo (1 Sam. 2:22-25; 3:11-14)

Samuela hnena Pathian thu lo thleng chu *"Israel ramah hian a hria apiangte beng khing hnih hniha ðhawng zawng takin thil ka ti dawn a ni....A (Elia) fate'n Pathian an sawichhiatna sual chu hre reng pawha a khap loh avangin....Elia chhungkaw bawhchhiatna sual chu inthawina emaw, thil hlanin emaw, eng tikah mah tikhian theih a ni lo vang,"* tih hi a ni. Samuela chuan Pathian hnen aṅanga a thu dawn chu Puithiam Elia a hrilh vek a.

Samuela thu dawn ang tak chuan Pathian rorelna chu a lo thleng ta a nih kha. Philistia ral bei turin Israel mite an kal chhuak a, he an inbeihnaah hian an hriatna hlui an hmang a; Jor-

dan lui an kan dawn te, Jeriko an beih dawn tea Pathian thupek ang thlapa Thuthlung Bawm an zawna hnehna an chante kha an hre reng a. Mahse, tun tumah hian Pathian thupek dawng thar miah lovin, Pathianin "la rawh u" pawh a tih hauh loh laiin anmahni thuin Thuthlung Bawm chu an la ta ringawt mai a. Pathian thupek a nih loh chuan Bawm chuan thiltihtheihna a lo nei hauh lo mai a, an hmelmaten an laksak daih a, an tlawm ta a. Sipai singthum an that a, Puithiam Elia fate pahnih pawh chu an thi a. Israel-te chu an tlawm a, Pathian Bawm pawh chu an laksak tih thu Puithiam Elian a han hriat chuan zangthalin a tlu a, a nghawng a tliak a, a thi ve ta a.

Thuthang mai ni lovin beng khinghnih thawng zawng tak chu Israel ramah a takin a lo thleng ta a ni.

Keini lam ve thung hi, Puithiam Elia dawn ang hi dawng ve ta ila, thiam thu sawi tur kan ngah awm mang e aw! Pathianin direct-in aw thum deuh dutin a be si lo, a hnuuia puithiam hna zir, naupang Samuela hmangin a hnenah thu a rawn thleng si a. Keini chu ni ta ila, "E! Samuel, i la hre tlem a nih kha, ka zilhhau nasa a, ka thawngtaisak reng baw, hei bak chu tihngaihna ka hre lo. Ama hnenah ka hlan tawp mai. Lalpan an thinsungah a la thawk ang," ti tein thiam thu kan sawi zat zat mai lawng maw?

Pathian pawhin, 'E! Puithiam, i tiha thawkhat e, an soal i zep lo va, an sim pawh i duh, i zilhhau nasa, an harsa em a nih hi, nang chu i fihlim e,' a ti chuang lo. *'Hre reng pawha a khap loh avangin'* ti h ni hmiah mai. A fate tihsual khap leh thunun chu Elia mawhphurhnaah Pathianin a dah tlat. A fate laka a mawhphurhna hi Pathian hnena hlan letin amah Elia chu indah awl mai thei a ni

lo. Fanaute hi Amah rinchhan chung a nu leh paten kan enkawl tura min pek a ni tih hi i hre thar leh ang u.

Chhung inkhawm te hi a pawimawh lutuk, Kristian chhungkua chuan an ti ngei thin. Mahse, chhung inkhawm kan neih a, kan thawngtai hma leh kan thawngtai zawh hnuia kan khawsak zui dan hi eng tin nge? Chaw ei paha thenawm khawvengte dik lohna te, rawngbawlpuite tlin lohna lai fate hriata tui taka sawi phul hlut thin kan nih chuan chhung inkhawm ngai pawimawh tak, mahse, mi dang tlin lohna tuipei tak fate kan nei a nih pawhin fate thiam loh vek bik a ni thei lo vang. Mahni chanvo chu ngai pawimawh tak, hlen chhuak hram thin, mahse, mi dang dinhmun ngaihtuah lek lova mahni hmasial, fing phakar tak fa kan neih pawhin an thiam loh leh an soal hrim hrim vang a ni vek bik lo vang. Elia leh a fate pawh khan an chanvo leh an mawhphurhna – puithiam hna, inthawina hlan chu an bansan lo mai ni lovin an ngaihtah chuang hauh lo asin. Mahse, an chhungkaw bawh-

chhiatna chu Israel ram pumin a chhiat phah ta si. Fatea Pathian tihna tak tak phun ngheh lama thahnemngaihna nei lem lova, kohhrana chanvo leh nihna an neiha, a tlangtla tawka an awm ve avanga kan lungawi mai a nih chuan kohhranin, khawtlangin, ramin a tuar ngei ang.

Mahni chhungkua theuh kan vei dan hi a la nep deuh lo maw? Nehemia chuan Jerusa-

lem a vei tih a sawi miah loh pawhin lalin a hmelah a hre thei tlat mai a, "*lungngai hmel i put tlat chu le,*" a ti thei. Keini ve thung chu kan sawi kan sawi chung pawhin vei tak tak lo hmuhin miten min hmu tlat em?

Chhung tinten thlarau leh tihtakzeta Pathian chibai kan buka, Kristian chhungkaw dik tak kan din theuh theih nan Lalpan a thu malsawm rawh se.

LAL ISUA, KAN THIAN THA BERIN (KHB no. 133)

- He hla phuahtu Joseph Scriven-a hi kum 1819 khan Dublin, Ireland-ah a piang a. Trinity College-ah a kal \hin a. A nupui neih hma zanin a nupui tur chu tuiah a tla hlum a, a tuar thiam lo em em mai a. Mahse, Lal Isua \hian tha a nei tih hriain, "Lal Isua, kan \hian tha berin, kan mangan laiin min lawm," tiin he hla hi a lo phuah chhuak ta a ni. Kum 25 a nihin Canada ramah a pem a, tlang chung a Isua thusawi nunpuin a neih zawng zawng a hrall a, mi retheite a \anpui \hin. He hla hi a nu damlo hnem nan a lehkhathawnah a zep a, tihtlangthan a duh ngai lo. A damlohvin a \hianpain a lukham hnuaiah he hla copy hi a hmu a, a zawt a. Ani chuan "Pathian nena kan phuah dun a nih hi," a ti mai a. Tichuan, he hla hi a lo lar ta em em a ni.

- *Kristian Encyclopaedia*
by Rev. Lalngaihawma

Hriselna huang

KAWTHALO LAKANAUPANGVEN LEH ENKAWL CHUNGCHANG

– *Dr. Esther Lalrammawii*

Kawthalo hi naupang kum 5 hnuai lam tana natna tlang lawn tak, natna hote a lang, mahse enkawl vat loh chuan thihna hial pawh thlen thei, hlauhawm tak si a ni.

Engtingge kawthalo chu a inkai chhawn theih?

Kawthalo hi a tam berah chuan kan invawn fai tawh loh vangin kan nei thin.

1. Inthiarna mumal nei lova remchang tihna hmun apianga kan inthiar mai te hian, ek atangin kan ei leh in turah natna hrik awlsam takin a kai thin a ni. Chutiang bawkin kan inthiar zawhah emaw, thil kan ei dawn emawa kut fai taka kan sil thin loh chuan awlsam takin kawthalo kan nei thei reng a ni.
2. Kan thil ei tur reng reng kan khuh that loh chuan tho leh rannung dangten an lo bawm a, kawthalo thlen theitu natna hrik kan lo ei tel reng thin bawh.
3. Tui thianghlim lo kan in hian kan kai awlsam em em bawh
4. Ke lawnga pawna vah mai mai te hi inkai chhawna awlsam tak a ni bawh.

Engtin nge kawthalo hi kan pumpelh theih ang?

Naupangte hi kawthalo leh natna tam tak lakah ven theih an ni a, an kua a tha lo a nih pawhin awlsam taka enkawl dam theih an ni. Chu vang chuan kawthalo vanga an thihna ngat phei chu nuai bo turin mi tin, chhung tin, khawtlang tinte hian mawh kan phur a ni. Hengte hi zawm ngei tum ila -

1. Naute thla 6 a tlin thlengin nu hnutetui chauh rintir tur a ni (Naute hnutetui chauh ring lote hian a let 10.5-in thihna an tawh hma bik).
2. Naute thla 6 a lo tlinin nu hnutetui bakah chaw tha dang pek tur a ni. Hei hian naupang thihna 6%-in a titem thei.
3. Vitamin A eitir thin tur a ni. Hei hi hri danna lak zingah pawh a tel a. A hun taka Vitamin A eitir

thin hian naupang thihna 12% ngawtin a titem thei a ni. Vitamin A hi Sub-centre-ah nautein thla 9-ah sentut hri danna a lak rualin pek tan a ni a, thla 6 danah pek tur a ni a, a vaiin tum 9 a ei tur a ni.

4. Hridanna lak that : Sentut laka hridanna bakah kawthalo thlentu Rota virus laka hri dannate lak tur a ni.

5. Tui thianghlim chauh in thin tur a ni. Kan tui in hi a fai ringawt tur a ni lo va, a thianghlimin natna hrik a awm lo tur a ni. Hei vang hian tui tihthianghlimna tura sawngbawl sa thlen theih lohna hmun kilkhawr zawkah chuan chhuan so dah vawh hi a himin a awlsam ber a ni. Tui thianghlim chauh in hian kawthalo kai theihna 31-52% laiin a tihnam a ni.

6. Sahbawn nena kut fai taka sil thin tur a ni. Hei hian kawthalo kai theihna 31% laiin a tihnam a ni. Inthiar zawh apiangin, thil ei dawnin, nau ek thiar zawhah, ei rawngbawl dawnin, ran ek/zun thiar zawhah te sahbawn nen kut fai taka sil thin tur a ni.

7. Ek inah ngei inthiar tur a ni a. Mihring/Ran ek leh bawlh-

hlawh dangte fel fai taka paih thin tur a ni a, mihring emaw, ran emaw tawh phakah te, rannung bawm theih tur tea hnutchhiah loh tur a ni. Hei hian kawthalo kai theihna 36% laiin a tihnam thei a ni.

Engtin nge kawthalo kan enkawlang?

1. **Oral Rehydration Solution (ORS)** : Kan hre lar hle awm e. ORS hian kawthalo avanga taksaa tui leh chi/electrolyte hloh tawh ai awh tur a siam thar leh a. A bik takin naupang kum 5 hnuai lamah kawthalo vanga thihna tam zawk hi he taksa tui tlakchhamna vang hi a ni a. A hun taka a nih dan tur anga naupang kawthalo zawng zawng hnena ORS pek hian kawthalo vanga thihna 93% laiin a tihnam thei a ni.

2. **Zinc** : Zinc hian kawthalo awm hun chung a pawt tawia, a nasa lutuk tur a veng a, thla thum chung chu kawthalo lakah naupang a veng a, kawthalo vanga kan ril chak lo tidamtu a ni a, hun rei tak chung atan taksain natna a do theihna turin a pui bawka ni.

Zinc hian kawthalo vanga thihna 23% lain a tihnam a ni.

ORS leh Zinc pek dan tur :

ORS : World Health Organization (WHO)-in a duan sa angasiam ORS chauh hman tur a ni a, siam sa, frooty anga pack hi kawthalo enkawl nan a tha tawlo. ORS (20.5gm) packet chu tui thianghlim litre 1 nen pawlh tur a ni a, chu chu darkar 24 chhung chauh hman tur a ni. ORS tui siam tawh reng reng chu darkar 24 hnuah chuan a bang a nih pawhin paih vek tur a ni. Naupang kum bithliah a pek dan hetiangin:

1. Thla hnih hnuai lam - an ek zawh apiangin thirfiante 5 tulh tur a ni.
2. Thla 2 atanga kum 2 - an ek zawh apiangin no ¼ atanga no ½ (50-100 ml) pek tur
3. Kum 2 atanga kum 5 - an ek zawh apiangin no ½ atanga no 1 (100-200ml) pek tur a ni.

An luak a nih pawhin tlem te tein muangchanga pek tur a ni.

ORS hi naupang kua a that loh tirth te atangin a that hun thlengin, an ek zawh apiangin pek ngei ngei tur a ni.

ZINC : Zing chu ni tin vawi khat ni 14 chhung pek tur a ni a. Naupang kum bithliah a pek dan hetiangin:

1. Naute thla 2 atanga thla 6 - zinc mum ½ (10 mg) tui thianghlim emaw, nu hnudetui emawah chawh rala, chumi tui chu pek tur a ni.
2. Naupang thla 6 atanga kum 5 - zinc mum 1 (20 mg) tui thianghlim emaw, nu hnudetui emawah chawh rala, chumi tui chu pek tur a ni.

Kawthalo a hlauhawmna leh enkawl that a ngaihna chhan:

Kawthalo hlauhawmna chhan chu – kaw that loh hian taksaa tui leh chi (salt)/electrolyte-te kan hloh va, chu chuan kan taksaa electrolyte awm dan pangngai leh nih dan a tibuai a, taksaa bung pawimawh hrang hrangah harsatna/natna a thlen a, enkawl vat a nih loh chuan dinhmun a chau tial tial a, thihna hial a thlen theih phah thin a ni. Naupang kawthalo taksaa, tui tlachham chu dinhmun pangngaia a awm leh thuai theih nan ORS leh thil tuiril dangte a rang thei ang berin pek ngei ngei tur a ni.

Engtin nge naupang kawthalo chuan taksa tui a tlachham tih kan hriat theih ang?

- A tirah chuan a tui a hal huam huam ang a, a awm hle hle thei lo va, a tlei lo vang a, ORS pek thuai a nih loh a, a nasat poh leh a zawi telh telh ang a, nikhaw hre lo hialin a awm ang.
- A mitkhur a thuk dek ang.
- A dul vun han piai/sawk ila, a pangngaia rang taka mar thin kha, zawimuangin a mar ve chauh vang.

Naupang kawthalo ORS leh Zinc-a enkawl mek chu a hnuaia tar lante a nei a nih chuan damdawi inah kalpui vat tur a ni.

1. Ziaawm lam a pan loh chuan.
2. Tui in thei lo/hnute hne thei lo.
3. Eka thisen a tel chuan.
4. ORS/Tui a in tlem chuan.
5. A khua a sik chuan.
6. A luak nasat viau chuan.
7. Ni 14 aia rei a kua a that loh chuan.
8. A kaih chuan.
9. A zawi nguai emaw, nikhaw hre lova a awm emaw chuan.

10. Naupang than thu, chaw tha hmu lo (Severe malnutrition) a nih chuan.

Kut sil dan dik

1. Kut chu tihuh la, sahbawn hnawih ang che.
2. Kut pahnih chu uluk takin nuai phuan ang che.
3. Kutphah hma lam, hnung lam leh kutzungtang leh a inkar zawng zawngte uluk takin nuai leh ang che.
4. Kut tin karte chu kutphah leh lamah nuai vek tur.
5. Banrek leh lam leh lam nuai tur.
6. Kuta sahbawn phuan chu fai taka tuia sil leh tur a ni.

Naupang kawthalo chungchang kan sawi avang hian naupang tan chauh kawthalo hi a hlauhawm bik tihna a ni lo va, puitlingah pawh naupang ang bawkin ORS hmanga enkawl vat kan ngai tho a ni. Chuvangin, kawthalo vah chuan mi thiam rawn kher lova kan lo inenkawl than theihna chu ORS hi a ni. Damdawi dang kan mamawh ang tur chu mahnia inchawh mai lovin doctor-te rawn ngeia ei hi a him ber a ni.

a

*Ei siam dan***BAWNGSA PICKLE**

Bawngsa ti	-	kg chanve
Chhibung var	-	no chave
Purun var	-	bul 2
Hmarcha	-	no khat
Sawhthing	-	1 inch.
Aieng	-	2 tablespoon (chaw eina thirfian)
Chi	-	a al tawk
Ajinomoto	-	teaspoon (thirfian te) chanve
Vinegar	-	1 tablespoon
Tel	-	pava khat leh a chanve
Tui	-	no khat leh a chanve

Bawngsa ti chu pressure cooker-ah tui tam vak lovin chhum hmin phawt la, a hmin hnuah kutin emaw, sakawrbakchehin emaw sin te tea thliar sin tur. Grinder-a her mai pawh a awlsam.

A chawhpawlh tur siam dan:

1. Chhibung var hi tel tel lovin kang hmui la, deng dip rawh.
2. Hmarcha ro, purun var leh sawhthing chu deng sawm bawk la. Hengte hi chhibung den sawm nen chuan kan pawlh rawh.
3. I thlak hnu rei vak lo, hmarchaa in kan ur hma ngeiin tui leih la. Tui chu a kan hil thak thlengin chhuang rawh.
4. Bawngsa her sawm sa chu a hranin, aieng leh pickle masala nen chuan kang la, a lo sen deuh hunah a chung a chawh pawlh tur i siam nen khian chawhpawlh la, ajinomoto leh vinegar telh rawh.

, *A chawhpawlh tur siam sa hmang hian tumbu, tawkte leh mautuai pickle-te pawh a siam theih a. Heng hi pickle-a siam tur chuan chhum hmin hnuah a tui hil thaka kan tur a ni. A tui a hil that loh chuan a dah that rei theih loh a ni.*

- Ramthianghlimi

*Hruaitute chanchin***PI VANLALROVI**

Pi Vanlalrovi hi Pu K. Pangliana leh Pi K. Lalluti-te fa panga zinga a upa ber dawttu niin August 25, 1962-ah Venghlui, Aizawlah a piang a. Kum 1993-ah Pu V.L. Chhuanga, Venghlui nen innein fa pakhat (hmeichhia) an nei a, Venghluiah in leh lo neiin an khawsa a. Economics & Statistics Department-ah Sub-Inspector of Statistics hna a thawk mek a ni.

Rawngbawlna lamah chuan KTP-ah theihtawpin a inhmang ve thin a, Branch OB chanvo te a lo chelh tawh a, Bial KTP-ah Committee member a lo ni tawh baw. Zaipawl rawng-bawlnaah pawh inhmangin Mizoram Synod Choir-ah leh Venghlui Bial Zaipawlahte a tel tawh thin.

Kum 2005 atangin Venghlui Kohhran Hmeichhe Commiittee-ah a tel tan a, kum 2013 atangin Office Bearer a ni a, Assistant Secretary leh Secretary chanvot lo chelh tawhin tunah hian Assistant Secretary a ni mek a. Bialah kum 2011 atangin Committee Member-ah a awm tan a, tunah hian Ex-officio Member a ni.

Tualchhung kohhranah chuan Puitling Sunday School Zirtirtu leh Thuhriltu chanvot a chelh mek a ni.

Bible chang a duh ber chu Sam 119:91, "*Thil zawng zawng hi i chhiahhlawhte an ni si a,*" tih hi a ni a. A hla duh ber chu KHB no. 433-na, "Ka Chhandamtu min vengin a hnai reng" tih hi a ni.

"Tling lo leh fel lo kan ni tih kan inhriatna hmangin Setana hian Lalpa duh zawng thawk thei lo tura min dan beh tlat hi a tum thin a, a pawh hle a ni. Mahse, kan felna Krista chauh rinchanin, Setana ram thiat turin, mahni nun chan chung zelin hma lam i pan ang u. Kan hneh ngei dawn a ni, *Hnehna chu Lalpa ta a ni si a,*" tiin min chah a ni.

ARUNACHAL WEST ZIN REPORT

– *Laldingliani, Secretary*
Bawngkawn Bial Kohhran Hmeichhia

Bawngkawn Bial Kohhran Hmeichhe Inkhawmpui, 2017 chuan, Ramthar zin ni se tiin a rel a. Kan tlawh tur hmun chungchangah Synod Office lam va dawr a ni a. Annin min lo kawhhamuh angin Arunachal West-a Thrizono Biala Bhalukpong-ah feh chhuah a ni. Bawngkawn Bial Kohhran Hmeichhe aiawh mi 14-te chu ei rawngbawl tur mipa 2 nen bus pakhatin kan kal a. Ni hnih chhung kan kal a, Pathian hruaina dawngin tu mah rui leh buaipui ngai kan awm lo va, lawmawm kan ti hle.

November ni 26–29, 2017 chhung Thrizino Bial Bhalukpong-ah hian Crusade neih a ni a. Speaker atan Rev. Vanlalbela, Bawngkawn Bial Chairman hman a ni. Crusade neih chhung hian Bialtu Pastor Lalramnghaka'n mi pali baptisma a chantir a, he lai hmunah hian baptisma chang an awm vawi khatna a ni nghe nghe a ni.

He lai hmun hi pawlho tu ma la tlawh pawh ngai loh a ni a. Kan han tlawh chu an hlimin an thlamuang em em a ni. Pathianni tlaiah Elephant Kohhran min tlawhpui hram a. Hetah phehi hi chuan Presbyte-

rian Kohhhran chauh a ding a, pawl dang an awm lo a ni.

Thrizino Bialah hian Kohhran pali leh Branch Church pathum a awm a. Upa nemngheh pakhat mah an la awm lo. Thawktute hi pakhat te tein kohhhran tinah hian an awm a, Bial Station leh Bhalukpong-ah hian thawktu pahnih ve ve an awm thung. Bhalukphong-ah hian member awm zawng zawng chu 29 an ni.

Bial thuthmunah a tula hman atan Rs. 10,000/- (Cheng singkhat) hlan a ni. Hotute min kawhhamuhnaa kal kan ni bawka, 'Ramthar Field chu a lo ni takzet a nih hi' kan ti a, hlawk kan ti hle a ni.

KUM 2017-2019 CHHUNGA INKHAWMPUI LIAN HRUAITUTE

Chairman	:	Pi K. Lalliantluangi
Vice Chairman	:	Pi Lalnuntluangi
Gen. Secretary	:	Pi Lalpianthangi Hrahsel
Asst. Secretary	:	Pi Lalmuanzuali
Treasurer	:	Pi Lalrinpuii
Finance Secretary	:	Pi Lalbiakhluni

COMMITTEE MEMBER-TE

- | | |
|-------------------------|------------------------|
| 1. Pi Lalsangliani | 2. Pi C. Thanthuami |
| 3. Pi Zangeni | 4. Pi B. Bualchhumi |
| 5. Pi Lalthanzami | 6. Pi D Nghmingliani |
| 7. Pi Lalngaihzuai | 8. Pi Biakchungnungi |
| 9. Pi Zoluri Sailo | 10. Pi F. Lalsangmawii |
| 11. Pi Liansangi | 12. Pi Chuauhmingliani |
| 13. Pi Zonunsangi | 14. Pi Thanghlupuii |
| 15. Pi Lalpianzami | 16. Pi Lalnunsiami |
| 17. Pi Lalhliapi | 18. Pi Lalthanruai |
| 19. Pi Sangthuami | 20. Pi Zasangliani |
| 21. Pi Lalrinpuii | 22. Pi R. Vanlalruati |
| 23. Pi R. Lalrampari | 24. Pi Zodingliani |
| 25. Pi P.C. Lalmangaihi | 26. Pi Lalremruati |
| 27. Pi Vanlalpari | 28. Pi R. Nuzawni |
| 29. Pi Lalduhthangi | 30. Pi Rothangliani |
| 31. Pi Lalsangluaii | 32. Pi Lalramthangi |
| 33. Ni. C. Lalrimawii | 34. Pi Vanlalrovi |
| 35. Pi Vanlalnghaki | 36. Pi Lalbiaksangi |

Ex-Officio Member-te

1. Rev. F. Lalrinnunga, Synod Moderator
2. Upa R. Dengzikpuia, Synod Secretary (Sr.)
3. Rev. P.C. Pachunga, Executive Secretary i/c Women
4. Pi Rinchawii, Ex-Chairman
5. Pi Sailuti (PWF)

KOHRAN HMEICHHIA

Thupui : Thuhretu atana koh (Tirh 1:8)

- Thil tumte:
1. Kohran pum rawngbawlna thlawhtling tura thawh ho.
 2. Kristian chhungkua din nghehtir tura tan lak.
 3. Tanpui ngaite Krista hminga tanpui.
 4. Chanchin Tha puan darh.



Postal Regn. No. MZR/ 53/ 2015 – 2017 RNI Regn. 40876/ 88



Rengtekawn Bial



Nisapui Bial



Zawnuam Bial

To _____

*Published by Rev. P.C. Pachhunga, Aizawl - Mizoram On behalf of Agape Association
Printed at Synod Press, Mission Veng, Aizawl - 796001 Copies - 40,200*

www.MIZORAMSYNOD.org